

Kaadi miiüb naise talu

Kaadi jovva-s õks imp uuta^q hummogot,
pääsö päävä nõsõngot,
jälke tull´ õks tä ülest kupõr-kapõr,
vidi üles vipõr-vapõr.
9275 Kaadi taha-s õks imp tetä^q talotüüd,
pertüs olla^q peremeheh,
muudku õnnõ õks kõõ mõtõl´ viinakõist,
leelot´ umma liikvakõist -
liikva oll´ õks küll Kaadi lelläkene,
9280 viin vana velekene.
Jälke tiidse õks tä tii liina poolõ,
astõ suurdõ alõvohe,
jälke läts õks tä kõrtse kõrraliste,
viinapuute veerüsähe.
9285 Lavva kai õks sis tävve kallist viina,
mahut´ viirde magusit,
sinnä ost´ õks kõõ sääntse sakuska,
linnuliha vorstikõise.
Mano tull´ õks sis pall´o tutuliisi,
9290 liidi liinast lilleliisi,
kiä olli^q õks naa^q sõbra^q sulasillõ,
nopõ^q noorilõ mehile.
Kaadsikõnõ õks sis naard´ kallehe,
muudsähe muhaskõlli,
9295 lavva kuts´ õks tä mano laadnahe,
võtma saia, sakuskat.
Mano istõ^q õks kui uma^q imändä^q,
olli^q Taadsist nää^q targõba^q:
Hebo heidi õks sõnno hiitrahe,
9300 Nabo häste nal´ atõlli.
Sis õks jo Kaadi naaraskõlli,
muudsähe muhaskõlli.
Sis õks nää^q jeivä^q katsi täüsi,
kolmi täüsi kummutõlli^q,
9305 sis jeivä^q õks nää^q pikre peräne,
ollõtsäärago otsane.
Sis nakas´ õks jo kol´o kumisõmma,
Kaadi pää kohisõmma,
ilodo õks imp olõ-s rahvast,
9310 tikõ tiikäjijist -
liina käve^q õks nää^q piti, käest kinni,
sõvvi^q sõrme nõal:
nuu^q olli^q õks täl Nabo^q naase iist,
tahe lipõ uma Taadi.
9315 Tunt´ saat´ õks sis mano sal´dusõ,
pakan´ paari-lahotusõ -
kolm õks tä päivä kul´atõlli,
viis päivä veerätelli.
Kõik jätt´ õks tä liina leeväraha,
9320 leti taadõ leotõlli,
Kaadstil jäivä^q õks jo punga puukoorõ^q,
karmaneh kalõ^q lastu^q.
Küll tund õks taa turg tuhanit,
kõrts kõvvo rahakõise -

9325 Kaadi löüse õks jal turust tuu mehe,
arma sõbra alõvost,
kelle möi õks ar korgõ kodo,
möi margadsõ maja.
Kaadi liit´ õks sis kodo linekil,
9330 keere kodo kipitkal.
Tuu tohi-s õks joht tarrõ minnä^q,
tarõ läve lähkohe:
agu nakas õks taa ese tõrõlõmma,
vana Tuum torisõmma?
9335 Kaadi lei õks sis jalga vasta maad,
hel´ot´ sõnno hiitrit:
”Õga taha-i õks ma tunda^q vanna Tuula,
kulla krundiperemiist!
Tuul om õks kui minol tuvikõnõ,
9340 peoh pehme tsirgukõnõ:
midä õks ma taha, tuud müü,
kuvva arva, anna kätte!”
Sis marsõ^q õks nää^q suurt maija piti,
kopsõ^q hüvvä koto piti,
9345 klaasi- õks kõik -ussõ^q kahisiva^q,
vaskivastusõ^q vabisi^q.
Taadsikõnõ õks sis sais´ tarõ kõrval,
oll´ noroh illos noorik.
Ostja kai õks kõik huunõnulga^q,
9350 kai kaartõ-alodsõ^q,
kõik kai õks sis kividse^q keldre^q,
kai karradsõ^q katusõ^q.
Liina lätsi^q õks jal liiko juumahe,
maja rahha raiskamma.
9355 Sääl tekk´ õks sis Kaadi viis imeht,
tekk´ kuus kummõtet:
koh oll´ õks küll pido, piire sisse,
läts mängo mäng´mähe.
Kaadi pill´ õks sääl peoga rahha,
9360 liit´ maalõ librikit.
Paprõ^q keere^q õks kui käest kimalasõ^q,
peost librigo^q lintse^q.
Kagoh oll´ õks sis torrõ Toomõ poig,
Kaadi suur liina lell -
9365 pido- oll´ õks kõõ -maja peremiiss,
oll´ iih suur esä,
midä õks tä tahtsõ, tuud tekk´,
kohe arvas´, sinnä astõ.
Kõik naari^q õks sis takah joodikõt,
9370 kõrdsi-tii kõnnikõt:
”Kohe lätt õks no tukõv Toomõ raha,
maja paprõ^q painusõ^q,
miä tekk´ õks taa Tuum pühapääväl,
keerät´ kerigo aigo?
9375 Õga läpe-s õks tä üüse maada,
läpe-s päivä puhada -
Tuum kor´as´ õks kõõ kokko tuhanit,
pand´ pakke papõrrahha.

Pujalõ õks no saa purutõlla,
9380 Kaadsilõ kapõrdõlla!”
Kaadsikõnõ õks sis autoga astõ,
kåve, mari, motoriga,
sisse kuts´ õks kõõ liinast leedeliise,
suurõst liinast s´olkaliisi.
9385 Viina- olli õks kõõ -putel veere pääl,
viinaliitre ligitsõllä -
kiä õks küll jei, toolõ and´,
kua himots´, hel´ot´ viina.
Küll omma^q õks naa^q joodigõ^q helde^q,
9390 pur´oh rahapuistaja^q!”
Kaadsil õlõ-s õks sis arvo rahasta,
õlõ-s tullu tuhanist:
kohe õks tä arvas´, sinnä and´,
tull´ tojo, tougas´ vällä.
9395 Oo õks tuud ulle Kaadsikõist,
turakot Toomõ poiga!
Inne õks tä kõrdsist kodo lää-s,
inne liinast kodo liidä-s,
(kõrtsih lätt õks küll tunnil mito tuhat,
9400 minotil mito sata),
kooni raisas´ õks tä tuu rahakõsõ,
pand´ liina nuu^q paprõ^q.
Kulla jää-s õks imp üttegi kop´kat,
mano üttegi margikõist,
9405 sis naksi^q õks jo Tiio^q tiukamma,
hundsakost huratamma.
Sis pilgõ õks tä kodo pümehel,
haldõ kodo hämaräl.
Tikõ tull´ õks sis vasta tii pääl,
9410 pakan vasta palo pääl,
tikõl olli õks sis käeh kuldaklaas,
peoh hõpõnõ pikre.
Kaadsit hõigas´ õks sõbrast kallest,
ütel´ turu tutvast:
9415 ”Mullõ annit õks sa toona turuh viina,
kõrdsih viina kõrralist -
sullõ taha õks ma tagase tasso^q,
katõvõrra kallutõlla!
No juu^q õks sa, Kaadsi, kaegu-i perrä,
9420 võta^q viina, vikur poiss!”
Kulda- nakas´ õks sis -klaasist kummutamma,
pill´ ma hõpõpikrest.
Kaadsi jei õks sis kaalane täüs,
visas´ veerine viina.
9425 Kaadsil läts õks jal otsane ullist,
tundi viinal turakost:
kodo läts õks sis otsane kuri,
ese majja ilma-vihhas´,
Kaadsi pess´ õks sis livva^q ne luidsa^q,
9430 pess´ arvado^q anoma^q.
Kaadsil õks sis kakk´ rahakarbi,
kapiussõ kangutõlli -
vana otsõ õks tä Toomõ tuhanit,
vana papa rahapakkõ.
9435 Vana õks Tuum sis tudisi,
papa väega värissi:
agu tulõ õks no Kaadsil kaala mano,
aase rinda riislõmma?

Kaadsil pess´ õks sis naist kui pinni,
9440 kolgõ provvat kui koira.
Ese tohi-s õks imp minnä^q kiildmähe,
kasvataja karistamma,
ime muudku õks kuts´ kull´a pujast,
kai hellä Kaadsikõsõst.
9445 Imekene õks sis ütäl´ vigurihe,
kandja kadsat´ kallehe.
Taadsil kakk´ õks ar rõiva^q kalõvutsõ^q,
puut´ poodista ostõdo^q.
Ime hõigas´ õks sis Kaadsil miilt piti,
9450 hõigas tojo tuntot piti:
”Tulõ^q õks sa, Kaadsil, kagoh nui,
võta^q pekkel peränulgast!”
Kaadsil juusk´ õks kooni nuia kaemahe,
pekeld pekko võtmahe,
9455 seeni juusk´ õks ar Taadsil tarõ taadõ,
läts vällä, ne välgähtõ.
Kagoh oll´ õks sis imel kibu käeh -
läts kandja kaala mano:
”Taadsil panõ õks no kosti kukrohe,
9460 lasõ ime lagipäähä,
et saadit õks ar pakko pardsikõsõ,
käsit käest käokõsõ!”
Imekene õks sis ikk´ ne pallõl´,
kandja heit´ hellä nime:
9465 ”S´oo sai õks no mullõ hoitmast,
pujalõ pudru andmast!”
Kaadsikõnõ õks sis kisõl´ kikkani,
purut´ poolõni õõni.
Kui naksi õks naa^q kiko^q kirgmähe,
9470 naksi^q kana^q kaaritamma,
sis läts õks ar mant tukõv Tunt´,
kalg´ miiss Kaadsil mant -
Tunt´ peläs´ õks kiko kirgmist,
peläs´ kana kaaritamist:
9475 kiko õks kiirge, kisk´ handa,
kukk kuuk´, läts kuupa.
Kaadsikõnõ õks sis veitõst viibähtõ,
raasakõsõst ar ramõhto,
oll´ õks sis tuimah tunni aigo
9480 poiss poolõ tunnikõist.
Tundi lasõ-s õks liim täl tud´oda,
pata liim paigah olla:
timmä otsõ õks kõõ oraga ülest,
kisi ülest kibõhõhõ.
9485 Ime kække õks ar Taadsil, käokõsõ,
paot´ piiripardsikõsõ,
kooni õks tuu joodik üles tull´,
kooni ull´ üles oido.
Sis kõnõl´ õks jal joodik suurõ joro,
9490 Kaadsil kärke kärehehe:
”Tuula lää õks no varra müümähe,
Taadsil koto kohendamma!”
Pessi õks tä kässi piito vasta,
kulakit koputõlli:
9495 ”Ma pelgä-i õks imp kümmed kiildjät,
sada man-saisjat!”
Sis läts õks jo turril Tuula poolõ,
kåve sinnä kärre miiss.

Tuulalõ õks sis näüdäs´ tuud papõrd,
⁹⁵⁰⁰ lugi perreh peletet:
”S´oo om õks et vara mu uma,
kallis vara Kaadsi uma!”
Sis läts õks taa tuimast vana Tuul,
heitõ timä hirmsahe:

⁹⁵⁰⁵ ”No jää õks ma ilma suurõst hüäst,
vana miiss umast varast!”
Kaadsi mõi õks ar kodo kogonest,
elitarõ igäväst.
Kaadsi tull´ õks sis vällä laulõh,
⁹⁵¹⁰ keerät´ vällä kiuhkoh.